

Na osnovu člana 8. i 23. Zakona o ministarstvima i drugim organima uprave Tuzlanskog kantona - prečišćeni tekst ("Službene novine Tuzlanskog kantona" broj: 10/18) i člana 14a. stav (1) Zakona o osnovnom odgoju i obrazovanju - prečišćeni tekst („Službene novine Tuzlanskog kantona“, broj: 10/20, 8/21, 11/21, 22/21, 5/22, 10/22, 11/22, 9/23-presuda US FBiH i 12/23), ministar obrazovanja i nauke Tuzlanskog kantona, donosi

## **O D L U K U**

### **o utvrđivanju uslova, kriterija, postupka i načina isplate za dodjelu stipendija posebno nadarenim redovnim učenicima osnovnih škola na području Tuzlanskog kantona u školskoj 2024/2025. godini**

#### **I - OPĆE ODREDBE**

##### **Član 1.**

##### **(Predmet)**

Ovom odlukom utvrđuju se uslovi, kriteriji i postupak za dodjelu stipendija u školskoj 2024/2025. godini, posebno nadarenim redovnim učenicima osnovnih škola na području Tuzlanskog kantona, te način isplate finansijskih sredstava.

##### **Član 2.**

##### **(Korisnici prava)**

(1) Pravo na dodjelu stipendije po ovoj odluci imaju posebno nadareni redovni učenici osnovnih škola na području Tuzlanskog kantona koji su ostvarili rezultate po sljedećim uspješnim ostvarenjima: opći uspjeh postignut u prethodnoj školskoj godini u smislu završenog razreda osnovne škole, uspjeh na takmičenjima iz predmeta iz nastavnog plana i programa, opći uspjeh ostvaren u prethodnoj školskoj godini u smislu završenog razreda paralelne muzičke škole, uspjeh iz oblasti tehničkog stvaralaštva, kulturno-umjetničkog stvaralaštva – književnih, likovnih, pozorišnih, muzičkih i plesnih ostvarenja i uspjeh iz oblasti sporta ili drugih oblasti koje se mogu dovesti u vezu sa obrazovanjem, koji se obrazuju i redovno pohađaju osnovnu školu na području Tuzlanskog kantona u školskoj 2024/2025. godini (u daljem tekstu: kandidat).

(2) Pravo na dodjelu stipendije po ovoj odluci ne mogu ostvariti redovni učenici koji su ostavili rezultate samo po osnovu općeg uspjeha postignutog u prethodnoj školskoj godini bez ostvarenih rezultata po nekom od drugih kriterija.

##### **Član 3.**

##### **(Finansijska sredstva)**

Finansijska sredstva za dodjelu stipendija osigurana su u Budžetu Tuzlanskog kantona za 2024. godinu na potrošačkoj jedinici 24010018 – Ministarstvo obrazovanja i nauke, Stipendiranje posebno nadarenih učenika osnovnih škola, ekonomski kod 614200 – tekući transferi pojedincima, OBD205 – Stipendiranje posebno nadarenih učenika osnovnih škola.

##### **Član 4.**

##### **(Visina stipendije)**

(1) Ukupna visina stipendije, po jednom kandidatu, u skladu sa odredbama ove odluke iznosi 1.000,00 KM (slovima: hiljadu konvertibilnih maraka).

(2) Isplata stipendije vršit će se u četiri jednake mjesečne rate, a visina jedne rate iznosi 250,00 KM (slovima: dvjestotinepedeset konvertibilnih maraka).

##### **Član 5.**

##### **(Ukupan broj korisnika stipendije)**

(1) Pravo na stipendiju po ovoj odluci može se odobriti za ukupno 100 kandidata u školskoj 2024/2025. godini.

(2) Izuzetno, pravo na stipendiju može se odobriti i za veći broj kandidata od broja utvrđenog u stavu (1) ovog člana ukoliko na rang listi veći broj kandidata ima isti broj bodova te nije moguće utvrditi prednost u skladu sa članom 12. ove odluke, i to isključivo ako sredstva za dodatno stipendiranje bude moguće obezbjediti u okviru sredstava planiranih u Budžetu Tuzlanskog kantona za stipendiranje nadarenih učenika i studenata

## **II - USLOVI I KRITERIJI ZA DODJELU STIPENDIJA**

### **Član 6.**

#### **(Uslovi za dodjelu stipendije)**

Pravo na dodjelu stipendije ima kandidat pod uslovom:

- a) da je državljanin Bosne i Hercegovine,
- b) da je redovan učenik osnovne škole na području Tuzlanskog kantona u školskoj 2024/2025. godini.
- c) da je ostvario opći uspjeh sa prosječnom ocjenom najmanje 4,80 u prethodno završenom razredu.
- d) da ne koristi ili nije dobitnik neke druge stipendije čiji je izvor finansiranja Budžet Tuzlanskog kantona i
- e) da je ostvario rezultate po nekom od drugih kriterija iz člana 7. tačke b), c) i d) ove odluke.

### **Član 7.**

#### **(Kriteriji za dodjelu stipendija)**

Rangiranje kandidata za dodjelu stipendije vrši se na osnovu sljedećih kriterija:

- a) opći uspjeh postignut u prethodnoj školskoj godini u smislu završenog razreda osnovne škole,
- b) uspjeh na takmičenjima iz oblasti predmeta iz nastavnog plana i programa u prethodnoj školskoj godini,
- c) opći uspjeh ostvaren u prethodnoj školskoj godini u smislu završenog razreda paralelne muzičke škole,
- d) uspjeh iz oblasti tehničkog stvaralaštva, kulturno-umjetničkog stvaralaštva – književnih, likovnih, pozorišnih, muzičkih i plesnih ostvarenja i uspjeh iz oblasti sporta ili drugih oblasti koje se mogu dovesti u vezu sa obrazovanjem postignut u prethodnoj školskoj godini.

### **Član 8.**

#### **(Bodovanje po osnovu ostvarenog općeg uspjeha u prethodnoj školskoj godini osnovne škole)**

Po osnovu općeg uspjeha postignutog u prethodno završenom razredu osnovne škole kandidatu pripadaju sljedeći bodovi:

- a) odličan uspjeh - prosjek 5,00. .... 10 bodova;
- b) odličan uspjeh - prosjek 4,90-4,99. .... 6 bodova;
- c) odličan uspjeh - prosjek 4,80-4,89. .... 3 boda.

### **Član 9.**

#### **(Bodovanje po osnovu uspjeha na takmičenjima iz predmeta iz nastavnog plana i programa)**

(1) U skladu sa Pravilnikom o organizaciji takmičenja učenika osnovnih škola ("Službene novine Tuzlanskog kantona", broj: 1/23) a na osnovu uspjeha iz predmeta iz nastavnog plana i programa, kandidatu pripadaju sljedeći bodovi:

- a) međunarodno takmičenje: postignuto prvo mjesto 20 bodova; drugo mjesto 17 bodova; treće mjesto 15 bodova; učešće 13 bodova
- b) državno takmičenje: postignuto prvo mjesto 15 bodova; drugo mjesto 13 bodova; treće mjesto 10 bodova
- c) federalno takmičenje: postignuto prvo mjesto 10 bodova; drugo mjesto 7 bodova;

treće mjesto 5 bodova

d) kantonalno takmičenje: postignuto prvo mjesto 5 bodova; drugo mjesto 3 boda; treće mjesto 1 bod.

(2) Ukoliko je kandidat rezultate iz stava (1) ovog člana ostvario u sklopu tima (ekipno, u paru itd.) dodjelit će mu se polovina od predviđenog broja bodova za pojedinačni uspjeh iz stava (1) ovog člana.

#### **Član 10.**

##### **(Bodovanje po osnovu ostvarenog uspjeha u prethodnoj školskoj godini u smislu završenog razreda paralelne muzičke škole)**

Po osnovu općeg uspjeha postignutog u prethodnoj školskoj godini u smislu završenog razreda paralelne muzičke škole, kandidatu pripada 2 boda za ostvaren odličan uspjeh i prosjek 4,50-5,00.

#### **Član 11.**

##### **(Bodovanje po osnovu ostvarenih rezultata iz drugih oblasti)**

(1) Po osnovu osvojenih mjesta na takmičenjima iz oblasti tehničkog stvaralaštva, kulturno- umjetničkog stvaralaštva – književnih, likovnih, muzičkih i plesnih ostvarenja i iz oblasti sporta ili drugih oblasti koje se mogu dovesti u vezu sa obrazovanjem kandidatu pripada po 1 bod za osvojeno neko od prvih tri mjesta na takmičenjima na međunarodnom, državnom ili federalnom nivou, s tim da se kandidatu po ovom osnovu ne može dodjeliti više od 3 boda bez obzira na broj takmičenja na kojima je kandidat ostvario navedene rezultate.

(2) Ukoliko je kandidat rezultate iz stava (1) ovog člana ostvario u sklopu tima (ekipno, u paru itd.) dodjelit će mu se polovina od predviđenog broja bodova za pojedinačni uspjeh iz stava (1) ovog člana.

#### **Član 12.**

##### **(Prednost pri jednakom broju bodova)**

Ukoliko na rang listi dva ili više kandidata ostvare isti broj bodova, prednost na rang listi ostvarit će kandidat koji je osvojio bolji rezultat/mjesto na višoj razini prema bodovanju iz člana 9. ove odluke.

### **III - POSTUPAK DODJELE STIPENDIJA**

#### **Član 13.**

##### **(Donošenje odluke i raspisivanje konkursa)**

(1) Odluku o raspisivanju konkursa za dodjelu stipendija posebno nadarenim redovnim učenicima osnovnih škola u školskoj 2024/2025. godinu donosi Ministarstvo obrazovanja i nauke Tuzlanskog kantona (u daljem tekstu: Ministarstvo).

(2) Tekst konkursa i obrazac prijave na konkurs utvrđuje Ministarstvo.

(3) Konkurs obavezno sadrži sljedeće podatke:

- a) naziv organa koji objavljuje konkurs,
- b) adresu organa kojem se zahtjevi podnose,
- c) uslovi i kriteriji za dodjelu stipendije,
- d) dokazi koje kandidati prilažu uz prijavu na konkurs,
- e) rokovi za prijavu na konkurs,
- f) prava i obaveze kandidata,
- g) način isplate sredstava i
- h) druge eventualno potrebne podatke.

(4) Tekst konkursa se objavljuje na zvaničnoj veb stranici Ministarstva, od kada počinje teći rok za predaju dokumentacije i isti prosljeđuje školama radi isticanja teksta konkursa na oglasnoj ploči za učenike.

## **Član 14.** **(Prijava na konkurs)**

(1) Prijave na konkurs sa potrebnom dokumentacijom, na jednom od službenih jezika u BiH, podnose se Ministarstvu, u roku od 8 dana od dana objavljivanja konkursa na veb stranici Ministarstva.

(2) Prijava na konkurs se vrši putem prijavnog obrasca koji je sastavni dio ove odluke (prilog I), koji se može preuzeti na veb stranici Ministarstva i u službenim prostorijama Ministarstva.

(3) Kandidat je uz popunjen prijavni obrazac obavezan dostaviti i:

- a) uvjerenje o statusu redovnog učenika osnovne škole u školskoj 2024/2025. godini (original ili ovjerena kopija),
- b) uvjerenje o državljanstvu (original ili ovjerena kopija),
- c) svjedočanstvo o prethodno završenom razredu škole (ovjerena kopija) ili ovjerena kopija stranica đачke knjižice na kojima se nalaze opći podaci o kandidatu i podaci o uspjehu postignutom u prethodnoj školskoj godini,
- d) ovjerena izjava roditelja/staratelja kandidata da kandidat ne koristi ili nije dobitnik neke druge stipendije gdje je izvor finansija za stipendiju Budžet Tuzlanskog kantona,

(4) Kandidat je uz popunjen prijavni obrazac i obaveznu dokumentaciju dužan dostaviti posebnu dokumentaciju kojom dokazuje uspjehe i rezultate iz određene oblasti za koju je posebno nadaren kako je navedeno u članu 7. ove Odluke a koje podrazumijevaju sljedeće oblasti: opći uspjeh postignut u prethodnoj školskoj godini u smislu završenog razreda osnovne škole, dokaz po osnovu uspjeha na takmičenjima iz oblasti predmeta iz nastavnog plana i programa, dokaz ostvarenog uspjeha u prethodnoj školskoj godini u smislu završenog razreda paralelne muzičke škole, dokaz po osnovu ostvarenih rezultata iz oblasti tehničkog stvaralaštva, kulturno-umjetničkog stvaralaštva – književnih, likovnih, pozorišnih, muzičkih i plesnih ostvarenja i iz oblasti sporta ili drugih oblasti koje se mogu dovesti u vezu sa obrazovanjem.

(5) Sva dokumentacija koja se dostavlja uz prijavni obrazac mora biti u originalu ili ovjerenoj fotokopiji, te na jednom od jezika u službenoj upotrebi u Bosni i Hercegovini (uz dokument izdat na stranom jeziku potrebno je dostaviti i originalni prijevod sudskog tumača ili ovjerenu kopiju prijevoda).

## **Član 15.** **(Imenovanje i sastav Komisije)**

(1) Konkursnu proceduru provodi Komisija koju imenuje ministar obrazovanja i nauke Tuzlanskog kantona (u daljem tekstu: ministar), u roku od 5 dana od dana objave konkursa.

(2) Komisija ima tri člana, imenovana ispred Ministarstva.

(3) Komisija za svoj rad odgovara Ministru.

(4) Članovi Komisije ne mogu biti lica čiji članovi porodičnog domaćinstva učestvuju u postupku za dodjelu sredstava po ovoj odluci.

(5) Komisija je dužna razmotriti prijave u pogledu blagovremenosti i potpunosti, utvrditi broj bodova po svakom od osnova i najkasnije u roku od 10 dana od isteka roka za prijave na konkurs sačiniti jedinstvenu rang listu i istu objaviti na veb stranici Ministarstva.

(6) Rang lista kandidata obavezno sadrži:

- a) prezime, ime jednog roditelja i ime kandidata,
- b) broj bodova po svakom od utvrđenih osnova,
- c) ukupan broj bodova po svim osnovama i
- d) pouku o pravnom lijeku sa tačno naznačenim rokom za ulaganje prigovora.

(7) Neblagovremene i nepotpune prijave Komisija neće uzimati u razmatranje, a prijavljeni kandidati o razlozima nepostupanja po zaprimljenim prijavama obavještavaju se isticanjem posebne liste.

(8) Ukoliko Komisija nakon razmatranja prijave i dokumentacije priložene uz istu utvrdi da kandidat ne ispunjava uslove iz člana 6. ove odluke, prijavu kandidata će odbiti, a prijavljeni kandidat o razlozima odbijanja prijave se obavještava putem liste iz stava (7) ovog člana.

## **Član 16.**

### **(Postupak po prigovoru i donošenje konačne rang liste)**

- (1) Na liste iz člana 15. stavovi (5) i (7) ove odluke, nezadovoljni kandidati mogu podnijeti prigovor u roku od 3 dana od dana objavljivanja listi na veb stranici Ministarstva.
- (2) Prigovor se podnosi Ministarstvu u pisanoj formi.
- (3) O podnesenim prigovorima odlučuje ministar u roku od 3 dana od dana isteka roka za podnošenje prigovora.
- (4) Nakon okončanja postupka po prigovorima konačnu rang listu kandidata utvrđuje ministar.

## **Član 17.**

### **(Ugovor o stipendiranju)**

- (1) Na osnovu konačne rang liste, ministar sa roditeljem/starateljem kandidata, zaključuje ugovor o stipendiranju, kojim se bliže uređuju međusobna prava i obaveze.
- (2) Ugovor iz stava (1) ovog člana zaključuje se u roku od 7 dana od dana isticanja konačnih rang listi na veb stranici Ministarstva.
- (3) Ukoliko roditelj/staratelj kandidata, u roku iz stava (1) ovog člana ne potpiše ugovor bez opravdanog razloga u pisanoj formi, kandidat gubi pravo na dodjelu stipendije, a stipendija se dodjeljuje prvom sljedećem kandidatu sa rang liste kandidata koji nije ostvario pravo na dodjelu stipendije.

## **IV - NAČIN ISPLATE STIPENDIJA**

## **Član 18.**

### **(Isplata stipendije)**

- (1) Stipendija se isplaćuje u četiri jednake mjesečne rate.
- (2) Isplata stipendija vrši se putem štedne knjižice ili računa korisnika stipendije, otvorenog kod banke na području Federacije Bosne i Hercegovine.
- (3) Evidenciju o korisnicima stipendija vodi Ministarstvo.

## **Član 19.**

### **(Gubitak prava na stipendiranje)**

- (1) Korisnik stipendije gubi pravo na dalju isplatu stipendije, ako u toku školske godine:
  - a) napusti redovno školovanje,
  - b) bude mu izrečena disciplinska mjera premještaj u drugu najbližu školu na području istog grada/općine,
  - c) po nekom drugom osnovu prestane mu status redovnog učenika,
  - d) ako se naknadno utvrdi da su prilikom prijave na konkurs iznesene netačne činjenice na osnovu kojih mu je stipendija dodijeljena.
- (2) Korisnik stipendije je dužan u roku od 30 dana od nastupanja okolnosti iz stava (1) tačka a), b) i c) ovog člana, obavijestiti davaoca stipendije o tim okolnostima.

## **V – ZAVRŠNE ODREDBE**

## **Član 20.**

Ova odluka stupa na snagu danom donošenja, a biće objavljena u „Službenim novinama Tuzlanskog kantona“.

**BOSNA I HERCEGOVINA**  
**Federacija Bosne i Hercegovine**  
**TUZLANSKI KANTON**  
**Ministarstvo obrazovanja i nauke**  
**Broj: 10/1-11-022476/24**  
**Tuzla, 03.09. 2024. godine**

**MINISTAR**

**Dr. sc. Ahmed Omerović**